

löcher deren töpffen herfür ghen. Außerhalb einem jeden ofen bey seiner andern seitten soll ein topff gsetzt werde / der kein schnauze hab / in welchs löcher deren zweyen schnauzen gangē / diser sol mitt ziegel steinen / daß er vhest bleibe zu beidē seittē verwart sein / so das schweflicht arz in die töpffen / die in die ofen gsetzt / gworffen wirt / müß man die selbigen als bald mitt einem deckel zü decken / vñ an welche teil sie mitt einem deckel züsamen stossen / müß man dasselbig mitt leim verstreichē / daß der schwefel nicht herauß rieche. Eben auß d vrsach / müß sendt die töpffen so vnder gsetzt seindt / mitt deckelē bedeckt / vnd mit leim verstrichen werden / so nuhn das holz angezündt / soll das arz so lang biß der schwefel herauß dömpffe / gsotten sein / der dunst so über sich gestigē / dieweil er durch die schnauzen in den vnderen topff fallett / wirt er zü schwefel / das wie ein zerschmelzt wachs in bodē herab fellt / auß welche / wann es auß dē loch / das am boden des töpffens ist herab gflossen ist / so macht d schmelzer eintweder ein stuck darvon / oder formiert wie die röz / oder stáb / oder macht schwefel hölzlin: bald soll er das brinnendt holz vnd glit auß dem ofen herauß ziehen / vnd so dise erkaltet seindt / soll er die zwen töpff auffschün / vnd sie von irem wüst auß lähren / welche so das arz auß schwefel vnd arz vermischet ist / seindt sie gleich der äschen die vō jr selbs außglöschet ist / so aber auß schwefel / erdt vñ stein / oder auß schwefel vñ stein allein / so ist die erdt sehr gedört / oder der stein viel gröstet. Darnach sollen die töpffen widerumb mitt arz gefüllt / vnd sollen eben dise ding alle widerumb fürgenomen / vnd getriben werden.

Töpffen mitt schnauzen A. Ein topff ohn schnauzen B. Die deckel C.



Aber vermischte gschwefelte ding / sie seyendt nuhn allein auß dem stein oder schwefel /